

# PLANIRANJE POJEDINAČNIH REVIZIJSKIH ANGAŽMANA FUNKCIJE INTERNE REVIZIJE

## Kako izraditi plan pojedinačne revizije?

### Kako obaviti procjenu rizika na nivou planiranja pojedinačnih angažmana funkcije interne revizije?

Kao potpora godišnjem planu funkcije interne revizije u nekoj organizaciji u kojoj djeluje interna revizija uobičajeno se izrađuje više pojedinačnih planova ili planova pojedinačnih angažmana, odnosno planova dodjeljivanja konkretnih zadataka radi ostvarivanja revizijskih ciljeva.

Institut internih revizora (engl. *The IIA Global*) je objavio Praktični vodič pod naslovom „Planiranje angažmana: utvrđivanje ciljeva i opsega“ čija svrha je osigurati internim revizorima detaljne smjernice za kvalitetno i djelotvorno obavljanje procesa planiranja pojedinačnog angažmana interne revizije.

Planovi pojedinačne revizije najčešće sadrže sažetak osnovnih revizijskih postupaka koji su detaljno razrađeni u programima revizije, vremenski raspored obavljanja određenih aktivnosti i potrebno osoblje, konkretne ciljeve i djelokrug rada. Aktivnu ulogu u pripremi takvih planova ima ponajprije osoblje funkcije interne revizije, uz odgovarajuću koordinaciju i nadzor glavnog internog revizora, koje na temelju vlastitih stručnih znanja, kompetencija, sposobnosti, iskustva i raspoloživih informacija treba, u operativnom smislu, razraditi godišnji plan interne revizije te u dogovoru s menadžmentom uskladiti vrijeme i druge potrebne resurse za njihovu realizaciju a da se pri tome ne ugrozi redovno odvijanje poslovanja poduzeća kao cjeline. Temeljna pretpostavka izrade kvalitetnih planova pojedinačnih revizijskih angažmana jeste prikupljanje informacija za razumijevanje područja ili procesa koji se provjerava te provođenje preliminarne procjene rizika područja ili procesa koji se provjerava. Dakle, za razliku od izrade strateških i godišnjih planova funkcije interne revizije, kada se provodi makro procjena rizika tj. procjena rizika na nivou poslovnog subjekta radi identifikacije prioriteta područja za reviziju na nivou organizacije u cjelini, prilikom izrade planova pojedinačnih revizija, polazeći odobrenog godišnjeg plana funkcije interne revizije, neophodna je procjena rizika područja ili procesa koji se provjerava kao temeljne pretpostavke za definiranje konkretnih ciljeva i konkretnog opsega revizijskog angažmana, zatim raspoređivanja resursa na angažman, te konačno dokumentovanje plana pojedinačne revizije.

Uz revizijske angažmane funkcija interne revizije obavlja i ostale vrste angažmana – savjetodavne angažmane i uvide. Navedene vrste angažmana funkcije interne revizije, uz revizijske angažmane, takođe se na odgovarajući način planiraju te se obavljaju uz prethodnu procjenu rizika.

Cilj ovog specijalističkog webinara je upoznati polaznike s koracima u izradi planova pojedinačnih revizijskih angažmana te aktivnostima planiranja pojedinačnih revizijskih i savjetodavnih angažmana te angažmana uvida. Detaljno će se uz odgovarajuće primjere pojasniti aktivnosti internog revizora u pripremi planova pojedinačnih revizijskih angažmana, posebno procjena rizika na nivou pojedinačnih revizija radi utvrđivanja ciljeva i opsega pojedinačne revizije, prema obvezujućim i preporučenim smjernicama u internoj reviziji te najboljim praksama.